

MH370: China pohon agar lebih ramai pakarnya dilibatkan
Astro Awani
27Mac 2014

BEIJING: China memohon agar lebih ramai pakarnya dilibatkan dalam usaha mengesan pesawat MH370 yang penerbangannya dikatakan berakhir di Lautan Hindi.

Hasrat Beijing itu disampaikan Timbalan Menteri Luar China, Zhang Yesui pada pertemuan beliau dengan Perdana Menteri Datuk Seri Najib Razak pada Rabu.

Jurucakap Kementerian Luar China berkata negara itu enggan berputus asa mencari lokasi sebenar MH370 dan meminta Malaysia membenarkan pakarnya meneliti segala data serta maklumat yang diperolehi.

China sebelum ini meminta Malaysia menyerahkan bukti serta data satelit yang membawa kepada kesimpulan MH370 terhempas di Lautan Hindi.

Selain memberi tumpuan kepada usaha mencari, China berkata pihaknya tidak akan melupakan kebajikan ahli keluarga penumpang pesawat berkenaan.

Katanya usaha membantu keluarga penumpang dari segi penjagaan kesihatan fizikal dan mental akan dipertingkatkan bagi memastikan kesejahteraan mereka.

Copyright © Astro Awani Network Sdn. Bhd. 2014 (535275-D). All Rights Reserved.

Source: <http://www.astroawani.com/news/show/mh370-china-pohon-agar-lebih-ramai-pakarnya-dilibatkan-32623?cp>